

THE HEAVENLY REGISTRY

(Revelation 20:11-15)

Ang pulong nga Registry means is an office where registers (**official lists – official records**) are kept. Kini nagpasabot nga ang pulong registry usa ka opisina o usa ka dapit nga anaa diha ang official nga mga listahan o opisyal nga mga record gitipigan. Mao nga dinhi sa atong nasod naay gitawag nga civil registry. Mao kini ang opisina diin gitipigan ang atong mga record gikan sa atong pagkatawo hangtod sa atong pagkamatay. Naa diha gitipigan ang imong record kon kanus-a ka natawo, kanus-a ka naminyo ug kanus-a ka namatay. Kini nga mga record sa atong kinabuhi dinhi sa kalibotan nga anaa sa civil registry, importante kini kaayo alang sa mga transaction nga atong pagahimoon. Sama pananglit; Kon mo-eskwela ka imong kining gikinahanglan, ko manarbaho, ko mo-abroad ka, kon magminyo ka imo kining gikinahanglan kay pangayoan man ikaw niini nga mga record. Apan dinhi sa kalibotan ang maong listahan o talaan sa atong kinabuhi dili hingpit. Mao nga dili ka matingala nga duna usahay mga sayop niini ug duna say mga fake nga mga record nga gituyo pag-usab. Dunay sayop nga mga spelling, sayop nga petsa, dunay sayop nga gender- imbis siya babaye, ang nabutang nga gender lalaki, imbis siya lalaki ang nabutang nga gender babaye. Imbis ang ngalan Victorina ang Victoriana. Usahay usab ang petsa. Sama sa akoo imbis April 17 ko natawo ang nakarecord April 37. Milapas sa calendaryo, kay ang sa calendaryo 31 raman ang pinakataas. Mao nga ako pod nga gipausab. Kini nagpasabot lamang nga dili siya hingpit nga record. Dunay mga panahon masayop ang maong mga record. Kon maghisgut kita mahitungod sa listahan o talaan sa atong kinabuhi nga wala gayoy sayop, ang hingpit nga talaan sa atong kinabuhi wala dinhi sa kalibotan, atua kini sa langit. Kining talaan o listahan sa atong kinabuhi nga atua sa langit, ang tanan nimong gibuhay dayag mana o sa tago nakarecord, bisan ang imong gipamulong nakarecord. Kining talaan sa langit ablihon kini sa Dios sa kataposang panahon dihang banhawon na ang mga patay aron hukman. Aron ato gayod kining masabtan atong hinumduman nga ang Biblia naghisgut sa duha ka pagpamanhaw. Mao nga aay gitawag sa Biblia nga the first resurrection.

THE TWO KINDS OF RESURRECTION

1. FIRST RESURRECTION : RESURRECTION OF THE RIGHTEOUS (Rev. 20:4-6)

Gipadayag 20:4-6 “Unya nakita ko ang mga trono ug ang mga naglingkod niini; gihatagan silag gahom sa paghukom. Nakita ko usab ang mga kalag niadtong gipamunggotan tungod sa pagsangyaw nila sa kamatuoran nga gipadayag ni Jesus, ug tungod sa pulong sa Dios. Wala sila mosimba sa mananap ni sa iyang larawan, ni napatikan ang ilang agtang ug kamot sa timaan sa mananap. Nabanhaw sila ug naghari uban kang Cristo sa 1,000 ka tuig. (5) Wala mabanhaw ang ubang mga patay hangtod nga miagi ang 1,000 ka tuig. Mao kini ang unang pagbanhaw. (6) Bulahan kaayo ang nahiapil sa unang pagbanhaw. Wala nay gahom kanila ang ikaduhang kamatayon. Mahimo silang mga pari sa Dios ug ni Cristo, ug maghari sila uban kaniya sulod sa 1,000 ka tuig.” Ang kataposang bahin sa bersikulo 4 nag-ingon ‘**Wala sila mosimba sa mananap ni sa iyang larawan, ni napatikan ang ilang agtang ug kamot sa timaan sa mananap. Nabanhaw sila ug naghari uban kang Cristo sa 1,000 ka tuig.** Kini nagpasabot nga Cristo niining panahona nakanaog na o nakablik na sa kalibotan diin duna siya pamanhawon aron mohair uban kaniya sa kalibotan sulod sa 1,000 ka tuig. Mao nga miingon ang bersikulo **Nabanhaw sila ug naghari uban kang Cristo sa 1,000 ka tuig.** Ang bersikulo 5 nag-ingon **Wala mabanhaw ang ubang mga patay hangtod nga miagi ang 1,000 ka tuig. Mao kini ang unang pagbanhaw.** Kini nagpasabot nga ang mga patay banhawon sa Dios apan kas-ahon pagbanhaw. Naay unahon, naay ipaulahi. Kon ikaw mahiapil sa unang hut-ong sa pagpamanhaw bulahan ka kaayo kay kini nagpasabot luwas ka, dili ka ma-impiyerno, siguro gayod kang uban kang Cristo kon apil ka sa gitawag sa Biblia nga unang pagpamanhan. Mao nga miingon ang bersikulo 6 **“Bulahan kaayo ang nahiapil sa unang pagbanhaw. Wala nay gahom kanila ang ikaduhang kamatayon.** Hinumdumi nga ang

ikaduhang kamatayon nagpasabot sa linaw nga kalayo. busa, kon mahiapil ka sa unang pagpamanhaw dili ka para sa linaw nga kalayo para ka sa Ginoo, luwas ka, dili ka silotan sa linaw nga kalayo.

1

Kini nagpasabot lamang gayod nga ang Biblia naghigut sa duha ka pagpamanhaw sa mga patay. Naay gitawag first resurrection kon unang pagpamanhaw. Kon mahiapil ka niini nga pagpamanhaw nagpasabot dili ka para sa linaw nga kalayo. Nagpasabot, ang first resurrection pagpamanhaw kini alang sa mga matarong. Unahon pagbanhaw ang mga iya ni Cristo. Ipa-ulahi ang mga daotan.

1 Tesalonica 4:15-17 “Ang pagtulun-an sa Ginoo nga gitudlo namo kaninyo mao kini: kita nga buhi pa inigbalik sa Ginoo, dili mag-una niadtong nangamatay na. (16) Unya mabati ang singgit sa pagmando ug ang tingog sa arkanghel ingon man ang lanog sa trumpeta sa Dios, ug mokunsad ang Ginoo gikan sa langit. Maoy unang mabanhaw kadtong nangamatay nga nagtuo kang Cristo. (17) Unya kita nga buhi pa niadtong adlaw, bayawon uban kanila didto sa mga panganod aron pagsugat sa Ginoo. Ug kita unya uban na kanunay sa Ginoo.”

Ang bersikulo 16 nag-ingon **Unya mabati ang singgit sa pagmando ug ang tingog sa arkanghel ingon man ang lanog sa trumpeta sa Dios, ug mokunsad ang Ginoo gikan sa langit. Maoy unang mabanhaw kadtong nangamatay nga nagtuo kang Cristo.** Ang kataposang bahin sa bersikulo nag-ingon **Maoy unang mabanhaw kadtong nangamatay nga nagtuo kang Cristo.** Kini nagpasabot nga ang tanang mga minatay banhawon apan dili dungan. Unahon pagbanhaw ang mga nagtoo kang Cristo, unahon pagbanhaw ang mga iya ni Cristo, unahon pagbanhaw ang mga matarong. Busa, dayag nalang nga ang ulahing banhawon mao ang mga daotan, ang mga dili luwas, ang mga dili iya ni Cristo. So, ang nagtudlo kanato nga dunay duha ka pagpamanhaw. Una- pagpamanhaw sa mga matarong, ikaduha-ang pagpamanhaw sa mga daotan, sa mga dili luwas, sa mga para sa impiyerno o linaw nga kalayo. Ari nasad ta sa pagpamanhaw sa mga daotan. Mao kini ang pagpamanhaw sa dako ug puti nga trono.

2. SECOND RESURRECTION – THE RESURRECTION OF THE WICKED (20:11-15)

Gipadayag 20:11-12 “Unya nakita ko ang dako ug puti nga trono ug ang naglingkod niini. Mikalagiw ang yuta ug ang langit gikan sa naglingkod sa trono ug wala na kini makita pag-usab. (12) Ug nakita ko ang mga patay, inila ug dili inila, nga nagbarog atubangan sa trono. Gibukhad ang mga libro, ug may lain pa gayong librong gibukhad nga mao ang libro sa kinabuhi. Gihukman ang mga patay sumala sa ilang binuhatan nga nahisulat sa mga libro.” Kini nga pagpamanhaw mao kini ang ikaduhang pagpamanhaw kay sa bersikulo 11 na kini. Sa bersikulo 4-6 naghigut na sa unang pagpamanhaw. Nag-ingon ang bersikulo 4-6 **Nabanhaw sila ug naghari uban kang Cristo sa 1,000 ka tuig. (5) Wala mabanhaw ang ubang mga patay hangtod nga miagi ang 1,000 ka tuig. Mao kini ang unang pagbanhaw. (6) Bulahan kaayo ang nahiapil sa unang pagbanhaw. Wala nay gahom kanila ang ikaduhang kamatayon.”** Pag-abot sa bersikulo 11-12 naghigut na usab sa laing pagpamanhaw, nagpasabot naghigut sa ikaduhang pagpamanhaw nga diin didto sila moatubang sa dako ug puti nga trono. Atong balikog basa ang bersikulo 11-12. Kini nga pagpamanhaw mao kini ang ikaduhang pagpamanhaw kay sa bersikulo 11 na kini. Sa bersikulo 4-6 naghigut naman sa unang pagpamanhaw. Ang bersikulo 12 nag-ingon **“Ug nakita ko ang mga patay, inila ug dili inila, nga nagbarog atubangan sa trono. Gibukhad ang mga libro, ug may lain pa gayong librong gibukhad nga mao ang libro sa kinabuhi. Gihukman ang mga patay sumala sa ilang binuhatan nga nahisulat sa mga libro.”** Kini nga pagpamanhaw, pagpamanhaw kini sa mga dili luwas, sa mga daotan, sa mga wala magtoo kang Jesus. Ablihon ang mga libro isip maoy basihan nganong angay silang itambog sa linaw nga kalayo. Dili kay ablihon ang mga libro kon luwas ba sila o dili. Kon dili ablihon kini aron basahan sila nganong angayan silang itambog sa linaw nga kalayo. Mao kini ang ipasabot sa maong bersikulo. Sama gud sa korte, nga before ang tawo itambog sa prisohan basahan una siya sa pila ka pahina nga gisulat sa huwes nganong angay siyang silotan sa maong silot. Mao nga naghigut ang bersikulo 12

dunay mga libro nga ablihon. Nag-ingon “**Ug nakita ko ang mga patay, inila ug dili inila, nga nagbarog atubangan sa trono. Gibukhad ang mga libro, ug may lain pa gayong librong gibukhad nga mao ang libro sa kinabuhi.** Naghisgut ni sa mga patay nga wala mahiapil sa unang pagpamanhaw. Ablihon ang mga libro isip maoy basihan nganong angay silang itambog sa linaw nga kalayo. mao nga mabasa nimo sa libro sa Daniel nga gipakita siya sa Dios mahitungod niini, ang pag-abli sa mga libro.

2

THE KINDS OF BOOK TO BE OPENED (Gipadayag 20:12; Daniel 7:9-10)

Daniel 7:9-10,13-14 (MBB) “Ug sa pagyahat ko, may gibutang nga trono ug milingkod niini ang walay kataposan; ingon sa niebe ang kaputi sa iyang bisti, ug sama ang iyang buhok kaputi sa delana nga puti kaayo, ang iyang trono kalayo nga nagdilaab; may ligid kini nga kalayo. (10)May suba nga kalayo nagbaha gikan sa iyang atubangan; libo ka libo nag-alagad kaniya, ug nagbarog sa atubangan niya, andam ang hukmanan sa paghukom, ug giablihan ang mga basahon. (13)May mga butang pa gayod nga nakita ko sa akong panan-awon. Ug nakita ko uban sa mga panganod sa langit ang daw usa ka tawo, ug miduol siya sa Walay Katopasan, ug gipaila siya kaniya. (14)Ug kaniya gihatag ang gahom ug ang himaya ug ang gingharian, aron alagaran siya sa tanang katawhan, walay pagkatapos ang iyang gahom, kay dili man malaglag ang iyang gingharian.”

Ang unang bahin sa bersikulo 9 nag-ingo “**Ug sa pagyahat ko, may gibutang nga trono ug milingkod niini ang walay kataposan;** Hinumdumi nga ang gihisgutan sa bersikulo nga “Ang “Walay Kataposan” sa AB “Tigulang sa mga adlaw” (Ancient of Days) nagpasabot kini sa Dios Amahan. Ug ang kataposang bahin sa bersikulo nag-ingon “**andam ang hukmanan sa paghukom, ug giablihan ang mga basahon**”. Kini naghisgut nga duna gayoy mga libro nga ablihon. Ug sa bersikulo 13 nag-ingon **(13)May mga butang pa gayod nga nakita ko sa akong panan-awon. Ug nakita ko uban sa mga panganod sa langit ang daw usa ka tawo, ug miduol siya sa Walay Katopasan.** Ang pag-ingon **Ug nakita ko uban sa mga panganod sa langit ang daw usa ka tawo,** kini nagpasabot kang Jesus. Gitawag siyag daw usa ka tawo kay dili man siya tawo apan nagpakatawo. Naghisgut kini sa pagbalik ni Jesus ngahin sa kalibotan. Gani gihisgutan kini ni Jesus mismo sa Mateo 24:30.

Mateo 24:30(MBB) “Unya motungha sa langit ang timaan sa Anak sa Tawo, ug manghilak ang tanang banay sa yuta, ug makakita sila sa Anak sa Tawo nga moabot sinapnay sa mga panganod sa langit.” Kini nagpasabot lamang gayod nga kanang gihisgutan sa Daniel 7:13 nga nga motungha uban sa mga panganod sa langit nagpasabot kang Jesus sa iyang pagbalik nganhi sa kalibotan diin siyag tugyanan sa Amahan sa paghukom. Mao ang buot ipasabot sa Danie 7:13-14 nga nag-ingon “**Ug nakita ko uban sa mga panganod sa langit ang daw usa ka tawo, ug miduol siya sa Walay Katopasan** (nagpasabot sa Dios Amahan). **(14)Ug kaniya gihatag ang gahom...** ” kini nagpasabot ihatag sa Dios Amahan sa iyang Anak nga si Jesus ang katungod sa paghukom sa kataposang panahon.

Juan 5:22(MBB) “Ang Amahan dili maghukom kang bisan kinsa, kay gihatag niya sa iyang Anak ang hingpit nga katungod sa paghukom.” Kini nagpasabot nga gihatag sa Amahan ngadto sa iyang Anak ang hingpit nga paghukom sa kataposang panahon. Nagpasabot, si Jesus ang maghuhukom sa mga tawo sa kataposang panahon. Diin sumala sa libro sa Daniel ug libro sa Gipadayag nga dunay mga libro nga ablihon. Unsa man kining mga libroha?

1. BOOK OF CONSCIENCE (listahan sa atong konsensya)

Roma 2:15-16 (MBB) “Nagpakita ang ilang batasan nga ang gisugo sa Balaod nasulat sa ilang kasingkasing. Ang ilang mga konsensya nagpakita usab nga kini tinuod sanglit ang ilang mga hunahuna usahay naglaban kanila ug usahay nagsupak kanila. (16) Sumala sa Maayong Balita nga akong giwali, mao kini ang mahitabo unya niadtong Adlaw, nga ang Dios pinaagi kang Jesu-Cristo, maghukom sa tinagong mga hunahuna diha sa kasingkasing sa mga tawo.”

3

Ang ikaduhang bahin sa bersikulo 15 nag-ingon **Ang ilang mga konsensya nagpakita usab nga kini tinuod sanglit ang ilang mga hunahuna usahay naglaban kanila ug usahay nagsupak kanila.** Kini nagpasabot nga nay gibutang ang Dios sa sulod nato nga mohasol nimo kon magbuhat kag daotan ug mouyon usab siya nimo kon magbuhat kag matarong. Dili ba kon magbuhat kag sayop bisag walay tawong nakakita ug walay tawong nasayod apan sa imong sulod adunay naghasol kanimo. Mao nga dili ka mahiluna, usahay ka makatulog. Mao na ang gitawag sa Biblia nga konsensya. Sama gud ni Cain. Sa panahon ni Cain wala pa ang balaod nga nag-ingon ‘Ayaw pagpatay’. Kay ang balaod nga nagdili sa pagpatay didto na kini sa libro sa Exodo. Apan ngano man nga si Cain nasayod man nga sayop ang iyang gibuhat, nganong nahasol man siya ug nagtagotago? Tungod kini kay naay gibutang ang Dios sa matag tawo, sa iyang sulod nga maoy motimbangtibang sa imong gibuhat. Kon mayo mouyon siya nimo, apan kon daoatn hasolan ka niya. Ang Biblia adunay talaan niini ug ablihon ra kini sa panahon sa paghukom. Aron ipakita nimo nga bisag gisudya-an ka sa imong konsensya wala gayod ka mamati.

1 Juan 3:20-21 “Kon sudyaan kita sa atong konsensya, labaw pang mosudya kanato ang Dios nga nasayod sa tanan. (21) Busa, mga igsoon, kon wala magsudya kanato ang atong konsensya, masaligon kita nga moatubang sa Dios.”

Kini nagpasabot gayod kanato nga naay gibutang ang Dios sa atong sulod nga mosudya kanato kon kita maghimo sala. Busa kon ang imong konsensya wala magsudya kanimo masaligon kang makaatubang sa Dios, apan kon ang imong konsensya nagsudya na kanimo, samot na ang Dios nga mosudya kanimo kay nasayod siya sa tanan nga anaa sa imong kasingkasing. Kini nagpasabot nga adunay listahan sa tanan nga anaa sa imong kasingkasing, ablihon ra kini ug gamiton kini sa kataposang paghukom. Mao nga tanang tinagoan nimo sa sulod sa imong kasingkasing mabutyag ra kana sa kataposang panahon kay dunay listahan ang Dios niana.

1 Corinto 4:5 “Busa ayaw kamo paghukom kang bisan kinsa sa dili pa moabot ang hustong higayon. Ang kataposang paghukom unya na himoa sa pag-abot sa Ginoo, kay ipadayag niya ang ngil-ad nga mga tinagoan ug ibutyag ang gililong nga mga tinguha sa kasingkasing sa tawo. Niadtong adlaw magdawat ang tagsatagsa sa pagdayeg nga angay kaniya gikan sa Dios.” Ang ikaduhang bahin sa bersikulo nag-ingon **Ang kataposang paghukom unya na himoa sa pag-abot sa Ginoo, kay ipadayag niya ang ngil-ad nga mga tinagoan ug ibutyag ang gililong nga mga tinguha sa kasingkasing sa tawo.”** Kini nagpasabot lamang nga adunay listahan ang Dios sa atong mga tinagoan sa sulod sa atong mga kasingkasing. Kay unsaon man niya pagbutyag kon wala siyay listahan niini? Mao nga mabasa nimo nga ablihon ang mga libro, dili lang kay ang libro ra sa kinabuhi. Ang libro sa kinabuhi usa lang sa mga libro nga ablihon. Lain pang libro nga ablihon, kining libro diin nakalist ang atong mga gipamulong.

2. BOOK OF WORDS

Mateo 12:36-37 “Ug sultihan ko kamo nga sa Adlaw sa Paghukom, ang tagsatagsa kinahanglan mohatag ug husay sa matag pulong nga walay pulos nga

iyang gisulti. (37) Kay ang inyong mga pulong mao usab ang gamiton unya sa paghukom kaninyo, aron maila kon kamo wala bay sala o sad-an ba.”

Ang bersikulo 36 nag-ingon “**Ug sultihan ko kamo nga sa Adlaw sa Paghukom, ang tagsatagsa kinahanglan mohatag ug husay sa matag pulong nga walay pulos nga iyang gisulti**” Kini nagpasabot lamang gayod kanato bisan sa pulong nga walay pulos nakarekord unsa pa ka ha sa mga pulong nga mapuslanon. Kini nagpasabot nga ang imong mga pagpamalikas, pagpanggimo, pagpanunglo, pagbugalbugal, pagpanghimaraot nakarekord diay kining tanan. Nasayod ang Dios pila ka pagpamutbot ang imong gihimo karong adlaw. Ug usa kini sa mga libro nga ablihon sa kataposang panahon, sa panahon sa paghukom. Kay unsaon man niya paghukom ang atong tagsatagsa ka pulong kon wala siyay listahan niini? Mao nga nag-advise kanato ang Biblia nga magbantay kita sa atong mga pinulongan kinahanglan ang mga pulong nga makapahimuot sa Dios, mga pulong sa kamatuoran, dili mga butbot.

4

3. BOOK OF WORKS

Ang lain pang listahan mao ang listahan sa atong mga gipangbuhat.

Ecclesiates 12:14 “Hukman sa Dios ang tanan tang buhat, bisan ang atong gibuhat sa tago, maayo o daotan.” Kini nagpasabot gayod kanato nga ang atong gipangbuhat dinhi sa kalibotan hukman ra kini sa Dios kay aduna siyay talaan niining tanan. Kon ikaw karon nagbuhat mag daotan nga wala masayri sa uban moabot ang panahon nga ibutyag ra kini sa Dios. Ayaw paabota nga hukman kana sa Dios, samtang pa kini moabot biyai na ang maong buhat aron dili magmahay.

Hebreo 4:13 “Walay butang matago gikan sa Dios. Ang tanan dayag ug makita sa iyang mga mata ug kitang tanan maghatag kaniyang husay sa atong binuhatan.”

Kini nagpasabot dili ka makaikyay kay bisan sa imong gibuhat sa tago dayag kini kaayo sa Dios. Ug sa panahon nga mohatag na ikawg husay sa Dios dili ka makapangulipas sa kataposang panahon kay nakarekord tanan nimong gibuhat. Dinhi sa kalibotan pwede man wad-on ang dokumento sa kaso, ug pwede bayran ang huwes o abogado aron ka makadog sa kaso. Apan ang paghukom sa Dios walay usa nga makaikyay sa hukom nga alang kaniya kay kompleto ang iyang record. Busa ayaw kahadlok sa tawo kahadloki ang Dios.

Mateo 10:26, 28 “Busa ayaw kamo kahadlok sa mga tawo. Walay tinagoan nga dili mahibaw-an ug walay sekreto nga dili mabut-yag... (28)Ayaw kahadlok niadtong mopatay sa lawas apan dili makapatay sa kalag; hinunoa, kahadloki ninyo ang Dios nga makalaglag sa lawas ug sa kalag didto sa impiyerno.” Busa kon ikaw karon aduna man tinagoan o sekretong binuang sa imong kinabuhi madayag rana sa kataposang panahon. Kay walay tinagoan nga dili mabut-yag ug walay sekreto nga dili mahibaw-an. Kon ikaw nakatago sa imong bana o sa imong asawa apan dili ka makatago sa Dios. Ayaw kahadloki ang tawo, ang Dios maoy kahadloki kay mao kini ang mosilot kanimo sa impiyerno.

Galatia 6:9 “Busa dili kita magtinapulan sa pagbuhat sa mayo; kay kon magpadayon kita moabot ang panahon nga makaani kita sa bunga niini.”

Kini usa ka pagdasig kanato nga kon ikaw nagbuhat mag matarong ayawg kaluya padayon kay nagpasalig ang pulong sa Dios nga madawat ra nimo ang angay kanimo nga ihatag sa Dios kanimo. Ang kataposang libro nga gihigutan sa Biblia nga ablihon mao ang libro sa kinabuhi.

4. BOOK OF LIFE (list of names of the saved people)

Lucas 10:20 “Apan ayaw kamog kalipay tungod kay ang mga yawa mipatuo kaninyo, kondili paglipay hinuon kamo kay ang inyong mga ngalan nahisulat didto sa langit.”

Kini nagpasabot gayod kanato nga dunay gitawag sa Biblia nga libro sa kinabuhi.

Filipos 4:3 “Ug ikaw usab, matinumanon kong katabang, buligi kining mga babayhana kay nagbudlay sila pag-ayo uban kanako aron pagsangyaw sa ebanghelyo, uban ni Clemente ug sa tanan kong katabang kansang mga ngalan nasulat sa libro sa kinabuhi.”

Kini nagpasabot nga si apostol Pablo nagtudlo nga kinahanglan kitang malista sa libro sa kinabuhi.

Gipadayag 20:15 “Ang tanan kansang ngalan wala mahisulat sa libro sa kinabuhi gitambog ngadto sa linaw nga kalayo.” kini nagpasabot kon wala ang imong ngalan sa libro sa kinabuhi kandidato gayod ka sa impyerno, sa linaw nga kalayo. Ug gihisgutan sa Biblia ang mga buhat nga para sa linaw nga kalayo. Ug sumala sa Biblia mao kini ang mga buhat diin kandidato ka sa linaw nga kalayo.

5

Gipadayag 21:8 “Apan ang mga talawan, ang mga mabudhion, ang mga malaw-ayon, ang mga mamumuno, ang mga makighilawason, ang mga salamangkiro, ang mga nagsimbag mga diosdios, ug ang tanang mga bakakon mahiagom gayud sa linaw nga kalayo ug asupre nga mao ang ikaduhang kamatayon.” Busa kon ikaw nagbuhat man niining mga buhata samtang sayon biyai ang maong buhat. Ang Biblia dayag kaayo nga nagsulti kanato nga wala gayod kay luna gingharian sa Dios kon magbuhat ka niining mga buhata.

1 Corinto 6:9-10 “Sa walay duhaduha nasayod kamo nga ang mga daotan dili makasulod sa Gingharian sa Dios. Ayaw pagpalimbong kay ang mga tawo nga makihilawason, o nagsimba sa mga diosdios, mga mananapaw, o nakighilawas sa isigkalalaki o isigkababaye, o kawatan o hakog, o mga palahubog, o tigbutangbutang, o mga malapason sa balaod, dili makasulod sa Gingharian sa Dios.”

Kon ikaw nagbuhat man niining mga buhata dayag nalang nga wala pa gayod malista ang imong ngala sa libro sa kinabuhi. Nan, sumala sa Biblia unsaon man nato pagpalista sa libro sa kinabuhi? HOW TO BE REGISTERED IN HEAVEN OR HOW TO BE REGISTERED IN THE BOOK OF LIFE?

YOU must be a true disciple of Christ

Lucas 10:20 “Apan ayaw kamog kalipay tungod kay ang mga yawa mipatuo kaninyo, kondili paglipay hinuon kamo kay ang inyong mga ngalan nahisulat didto sa langit.”

Kini nagpasabot gayod kanato nga si Jesus nagtudlo gayod sa iyang tinun-an nga dunay libro sa kinabuhi didto sa langit. Ug sumala ni Ginoong Jesus giingnan niya ang iyang mga tinun-an nga ang ilang mga ngalan nasulat na sa libro sa kinabuhi. Wala moingon nga isulatay pa. Hinumdumi nga mga buhi pa sila niining panahon. Apan miingon si Jesus kanila **‘paglipay hinuon kamo kay ang inyong mga ngalan nahisulat didto sa langit.’** Kini nagtudlo kanato nga kon gusto kita nga ang atong ngalan malista sa libro sa kinabuhi kinahanglan kitang mahimong tinun-an ni Cristo Jesus. Kinahanglan kitang mahimong magtotoo kang Jesus. Kinahanglan kitang motoo ug modawat kaniya nga maoy atong Manluluwas sa atong kinabuhi.

Filipos 4:3 “Ug ikaw usab, matinumanon kong katabang, buligi kining mga babayhana kay nagbudlay sila pag-ayo uban kanako aron pagsangyaw sa ebanghelyo, uban ni Clemente ug sa tanan kong katabang kansang mga ngalan nasulat sa libro sa kinabuhi.”

Kini nagpasabot nga si apostol Pablo nagtudlo nga kinahanglan kitang malista sa libro sa kinabuhi. Ug mahimo lamang kini karon nga buhi ka pa. Kay kining gishisgutan ni Pablo

kansang mga ngalan nasulat na sa libro sa kinabuhi, mga buhi pa kini sila nga mga tawo. Ug kining mga tawhana, mga tawo kini nga mga magtotoo na Cristo sama ni apostol Pablo. Busa, kinahanglan kita nga mahimo gayod nga tinuod nga sumusunod ni Cristo aron kita mahiapil sa maong listahan. Mao bitaw nga gitawag kinig Book of Life tungod kay listahan kini sa mga tawo nga nakabaton sa kinabuhing dayon, listahan kini sa mga tawo nga nakabaton na kang Jesus nga maoy ilang Ginoo ug Manluluwas sa iyang kinabuhi kay si Jesus mao man ang kinabuhi. Sa lain pang pagkasulti listahan kini sa mga luwas

Buhat 4:12 “Ang kaluwasan makaplagn lamang diha kaniya, kay wala nay laing ngalan sa tibuok kalibotan nga gihatag sa Dios ngadto sa katawhan nga makaluwas kanato.” Kini nagpasabot kon gusto kang maluwas, kon gusto kang malista ang imong ngalan sa libro sa kinabuhi didto sa langit kinahanglan motoo kang Jesus. Makigrelasyon ka kang Jesus. Makig storya ka kang Jesus. Ilha gayod siya nga maoy imong bugtong Manluluwas ug Ginoo sa imong kanabuhi.